

書

姑溪居士前集五十卷後集二十卷

宋李之儀撰之儀字端叔宋史稱滄州無棣人而吳芾作

前集序乃曰景城人考元豐九域志熙寧六年省景城入

樂壽則當為樂壽人史殆因滄州景城郡橫海軍節度治

平九年嘗由清池徙治無棣遂誤以景城為無棣也陳氏

書錄解題據所題郡望稱為趙郡人益失之矣之儀元豐

中舉進士元祐初為樞密院編修官通判原州元符中監

內香藥庫以嘗從蘇軾幕府為御史石豫劾罷崇寧初提

舉河東常平坐草范純仁遺表過於鯁直忤蔡京意編管

太平是編前集五十卷為乾道丁亥吳芾所輯併為之序

姑溪居士之儀南遷後自號因以名其集也後集二十卷不知誰編然文獻通考已著錄則亦出宋人手矣之儀在元祐熙寧間文章與張耒秦觀相上下王明清揮麈後錄稱其尺牘最工然他作亦皆神鋒俊逸徃徃具蘇軾之一體蓋氣類漸染與之化也其詩名稍不及黃陳論者因蘇軾題其詩後有暫借好詩消永夜每逢佳處輒參禪句遂以為諷其過於僻澀今觀集中諸詩雖魄力雄厚不足敵軾然大抵軒豁磊落實無郊島鉤棘艱苦之狀註家所論附會其詞非軾本意矣

姑溪居士文集序

李公端叔以詞翰著名元祐間余始得其尺牘頗愛其言思清婉有晉宋人風味恨未覩他製也乾道丁亥假守當塗因訪古來文士居此邦而卓然有聲于世者惟李太白郭功父與端叔三人郡舊有太白功父集而端叔獨闕然求于其家而子孫徃徃散落無復遺稿間得之邦人類而聚之命郡士載翬訂正釐為五十卷鈔板于學昔二蘇于文章少許可尤稱重端叔殆與黃魯直晁無咎張文潛秦少游輩頡頏于時今觀其文信可知已或謂端叔晚節銳于進取有所附麗雖若可疑然范忠宣公遺奏極于鯁切詆斥不顧一時用事者欲寘忠宣之子于理端

叔慨然自列謂實出其手既而公所為忠宣行狀復出由是得罪南遷廢錮終身曾不少悔其勇於義若此詎可以微瑕掩之哉余固愛其文又表其行誼之可嘉者併以詔于後云端叔名之儀其先景城人既謫而南始居姑溪自號姑溪居士今以名其集天台吳芾序

附錄

李端叔真贊

龍眠居士畫

東坡

須髮之拳然眉宇之淵然披曾腹之欣然以為可得而見歟則漢乎其無言以為不可得而見歟則已見畫于龍眠矣嗚呼其將為不雨之雲以抱其全乎其將為既琢之玉以役其天乎抑將游戲此世而時出乎兩者之間也

夜直玉堂攜李之儀端叔詩百餘首讀至夜半書其後玉堂清冷不成眠伴值難呼孟浩然暫借好詩消永夜每逢佳處輒參禪愁侵硯滴初含凍喜入燈花欲鬪妍寄語君家小兒子他時此句一時編

贈別李端叔

山谷

我觀江南山如身不受垢憶食江南薇子獨于我厚在北思江
山如懷冰雪顏千峯上雲雨岑絕何由攀當時喜文章各有兒
子氣尔來頷頽白有兒能拜起讀書浩湖海解意開春水成山
更崇崛頽我醜丘陵白玉著石中與物太落落涇渭相將流世
不名清濁乞言既不易贈言良獨難古來得道人挂舌屋壁間
牧羊金華道載酒太玄宅支頤聽晤語願君喙三尺我行風雨
夜舡牕聞遠鷄故人不可見故人心可知

寄李端叔編修

少游

旗亭解手屢冬春聞道歸來白髮新馬草裹屍心未艾金龜換
酒氣方振夢魂偷遠邊城月導從公穿禁路塵知有新編號橫
槩為憑東使寄淮濱

跋李端叔帖

初寮

端叔從故侯蘇公米鄉里倡酬題記處處有焉端叔亦自有蘇
李同時之語觀此書帖撫事懷人惘然久之紹興癸丑八月朔
定武王安中履道題

姑溪居士文集卷第一目錄

古賦

閒居賦

古詩一

謁李太白祠

累日氣候差暖梅花輒已弄色聊課童僕芟培灌以

助其發戲成小詩

彥行和梅詩甚工輒次元韻

次韻君俞病中見寄

題步雲亭



題渭濱亭

題山堂

送儲子椿叅假太學時泊舟金陵風亭

走筆贈報寧老

和郭功甫遊采石

采石三題

捉月亭 李太白

賞詠亭 袁彥伯

鑑然亭 太真

姑溪居士文集卷第一目錄

姑溪居士文集卷第一



趙郡李之儀端叔

古賦

閒居賦

嗚呼閒居之為樂也樂其所可樂也樂非其可樂不為閒居也
樂其居之閒然後知閒居之為可樂也迹雖是而心不在焉與
夫故為其迹而資以藉口者乃閒居之戮民非樂閒居者也樂
其樂者君子之樂也未始知其樂而盜有其名者小人之樂也
潘岳之賦名則是矣而心則不閒也失志自寓其無可奈何而
形容其不得已者也戮民不足以言之也陶淵明歸去來似無

頃刻休息而超然自放于造物之外陶然自得于言意之表居
不閒而得閒居之樂也有一念不為閒有一境界不為居形如
槁木心如死灰尸居而龍見雷聲而淵默得其一未知其二也
終日言而未嘗言終日行而未嘗行其庶幾乎孔子居鄉黨似
不能言者其言曰毋意毋必毋固毋我又曰予欲無言又曰吾
與回言終日不違如愚申申如也天天如也累累然如喪家之
犬也魯人則曰此東家丘耳夫是謂之閒居而樂不足以言之
也漢儒所記閒居燕居是其日用之常而非其所得之樂也惟
彼不類造次必偽于以行己狼藉自棄蒙不潔而反以銜鬻蹈
荆棘而不知所避務淺陋之為夸而不識人間有羞恥事方且
忽婁猪艾豨之歌而擁宋朝之弊帚安燕婉蘧蔭之刺而歸河
水而高峙杜門却掃而閭里坐視其左右動容變色而肉食率
懷其可畏一顰一笑惟我之從則言發而利害隨之一動一靜
立我之異則頤指而百罹斯值以是而日輸月賦如征焉以是
而土積海納如歸焉乃曰我閒居者也是又潘岳之罪人而謂
君在上為可免則予不知其所以也

古詩一

謁李太白祠

愛君獨酌板橋句想君不向嵇山時千載風流同一轍孤墳數
尺埋蒿藜文章誤人豈當日殺名雖好終何為譬之花卉自開

落又如時鳥啼高低行吟漫羨江魚腹鵬來空賦予何之君不見吾腰恥為小兒折或車或棹聊為期又不見羸顛劉蹶不到耳採花摘實相維持春寒漠漠青山路厚顏已覺歸來遲一塵尚冀容此老與君朽骨分東西

累日氣候差暖梅花輒已弄色聊課童僕芟削培灌以助其發戲成小詩

京洛三十年作客每見梅花欲忘食時魂夢到江南足跡塵埃來不得嗅香嚼蕊不忍捨為憐絕韻真顏色誰知晚得江南身特此一株當舍此寒根老枿初不辨幾與桑榆同棄擲殷勤地主故指示頓覺儵然超眼域幾山氣候也深春散枝頭危

欲坼呼奴隣家借刀斧穿斷因之聊拂拭便宜邀月作嘉賓不惜淋漓慰疇昔解后梅花同作客此理雖龜亦難食道人無眼自起群定裡觀之想應得為惜花開將及時枕上朝問天色自是春工力尚堅一向風頭來自北昨夜雪深幾一尺不覺起來欲跳躑雪過春回固可期聊與此花為畛域今朝舉頭消息別物理人情原未折綠萼柔條宛相契正色真香淨如拭更煩妙語為詮評莫遣塵根迷夙昔

花是主人身是客更欲花前羅酒食花應笑我強相親畢竟人花誰是得金樽到手我自醉道人何妨且觀色三界觀來即是空醉裡寧知漸遊北等為圓鏡隨身現認着分明却虛擲持此

問花之不答嗟我與君徒入城不如收却閑眼坐萬境紛々任
披垢一番風雨便紛飛念垢情塵漫磨拭今年春盡有明年花
落花開幾今昔

彥行和梅詩甚工輒次元韻

春風不揀尊前客未必蒸羹輸肉食玲瓏點綴移月窟誰謂吾
家最先得直從去臘約為伴旦々相看無倦色朝扶枝日彩爛
迎東夜插斗杓寒挂北擬將西子作孤注對與春工分一擲又
疑妖冶瀆清真子細籌量信難域發狂不意落紙上勝句爭來
共推垢諸郎獨殿語尤老似欲塵埃劇湔拭不惟詩社頓光輝
枝上分明過于昔

次韻君俞病中見寄

老眼逢春如有隔不覺花前手頻拭昔陪韋杜尺五天此地去
天今幾尺東家有客貧春甚酒作衾稠花作枕瘦逼休文臂漸
消渴近相如尤殫飲賞心直以花為命醉頭只恐扶難正春歸
每恨太忙生不惜一春常似病我老無用終安之屢欲從君獨
較遲方將結束窮勝致投惟祇許春相知詩來苦訴不自樂春
固惱人多索寞何妨強襲起應劉間促扁舟尋李郭君不見樂
羊功名方燁々歸來謗書已盈篋爭如隨地任低昂漫浪猗玗
盡元結

題步雲亭

昨夜風高蟬半咽起來知是白露節玉面少年窄袖衫袖裡新
詩似冰雪幾日炎、如甌中今朝忽覺超樊籠不惟氣候已八
月更得冰雪開心胸謝公山人詩筆奇問君何緣得此詩報我
我欲步雲去山人許我因由題君作斯亭幾許高擬推皓魄翻
銀濤誰謂姮娥落君手坐遣山人詩思勞君不見梅老句出天
地窄曾謂山人真太白采石月下憶相逢笑披錦袍弄明月十
年明月歸謫仙姮娥豈得在君邊何妨邀取山人去卒歲扶攜
醉笑間

題渭濱亭

廣張三千六百鈞太公欲與文王親文王不為熊羆獵卜年七

百終何人開元天子降步輦當日何如渭濱見是同是吳不可
詰二等風雲符虎變吾君好賢軼前古處、鵝鷺刷修羽觀君
命意非苟然他日風流須再觀

題山堂

二年江南客對面不見山負我愛山心兀、塵埃間一聞說山
心便喜欲插脩翰遽飛起君家乃是山中居永日青山同徙倚
流泉涓、薜蘿暗明月時、窺枕簟三伏清霜帶雪來不斷烟
雲擁欄檻只恐居山興易闌萬壑波濤翻等閑知有心期難得
否憑君借與西園看

送儲子椿叅假太學時泊舟金陵風亭

金陵二月春江上連日雨暖風初報一番晴綠淺紅深行數與
君已是隔年別相逢又作臨分語感君情重故可歌送君心折
不成舞五年相從如一日物々誦評窮髮縷愛君正如翰上鷹
畏君何翅文中虎來飯已知必下趙甕軾會觀終報楚逡巡炤
眼綠袍新更約十分同一舉

走筆贈報寧老

半山老人筆如椽落筆直欲擘雲烟東亭右軍不復見龍跳虎
卧誰爭先姑溪六月汗流水解后清風頓如洗他時問法到山
前應許神光得吾髓

和郭功甫遊采石

卒歲惜々無地雪三首新詩報明發使君近作采石遊勝踐傳
聞驚久缺元陽便有欲雪意和氣先期振巖穴想見旌旗錦繡
張如從元君朝北闕後攜一老何奇我朱顏鶴髮超塵埃嗷呼
江上來席上迤邐萬古隨雲開騎鯨仙人不敢避玉鏡臺即俄
復迴分明月下遇賞嘆將軍新自天邊來逡巡落筆轟春雷落
花亂點荒池臺沉埋藁葬見一旦名高此地真當才從來不許
說前輩寄教魚鳥休驚猜直疑乘槎叩月窟又若登臨望天台
酒行已徹更須酌醉倒寧辭無算杯卓然一段極則事遣我擊
節因誰催

采石三題

捉月亭 李太白

我昔揚帆下盧阜落帆采石春欲暮江南江北只見山欲識錦
袍無問處夜深明月來青天天水茫茫月連霧想見扁舟捉月
時江心見月如相遇醉魂不制月可捉捉得便將天外去月在
人亡天莫詰髣髴風流誰與晤迤來水落洲渚出隔岫潮迴疑
可步聒耳啁啾不得聞對案腥臊難下筋多情禪客饒佳趣粉
飾餘光扶墜緒欲回古月換今人到此脩然忘世慮從來喜誦
騎鯨句亦復買田相近住會當載酒十分圓同指虛無問征路

賞詠亭 袁彥伯

爨下得餘薪便可歌南風參差長路鋒鼓樂俄相同一棄一流
落悠然會天工始知盛衰際遇與不遇中風清月正好爽晤聊
從容豈意接心期賞嘆如雲龍千載瞬息尔轉眄歸虛空何遠
非遠然神交付冥鴻

鑑然亭 太真

温公天下士百計興艱危大廈勢已傾意欲一木支功名等山
岳德澤均雨露奈何談笑間而取鬼神怒鬼神豈不鑒忠義當
扶持一見亦何傷冥路俄與期似非理所安端恐數應盡邂逅
不可逃紛々遂為信孔子昔有言既敬亦須遠三復而三思臨
風更三嘆

姑溪居士文集卷第一終

姑溪居士文集卷第二目錄

古詩二

七言古風寄題薛公尉氏逍遙閣兼送伯成知縣宣德
解印當塗直書民言耳非所謂詩也

送芝老

題王循書院壁

近得石菖蒲胡伯鎮見之謂必以錦石資藉乃可以久
遽輟所有為貺仍枉佳句次韻奉謝

丁德儒置酒適與陳君俞聯坐聊賦小詩為君俞謝以
因以贖先起之罪

贈劉九思山人

題繁川徐氏孝巖亭

次韻秦處度同登黃山

處度再和前詩見寄復次韻報之

次韻陳君俞携酒見過

迎暉閣

和遊一人泉

秀遠堂次趙德孺韻

中隱菴次趙德孺韻

庄居值雨偶得十詩示秦處度

姑溪居士文集卷第二目錄

姑溪居士文集卷第二

趙郡李之儀端叔

古詩二

七言古風寄題薛公尉氏逍遙閣兼送伯成知縣宣德
解印當塗直書民言耳非所謂詩也

長身少髯復多骨憶在兒時獲相識滿朝善類推老成鄉曲名
流誦才德爾來契濶四十年停鳶峙鵠欣相傳我方却歸不自
得但覺和氣如春天先日朝門炙可熟今朝吏鬢幾無烟追呼
輩伍殆千指一旦束手蚕如眠父老相傳語且泣岌々流離遽
安集省事以來無此君豫恐他時莫能及尺紙胡為來北闕樂

境危城俄見欲覆盆雖光亦斲尔所惜時間未能雪稍傳遠近
或歡喜嘆者吾民喜者吏吏至酌酒更相賀畢竟卷舒須在我
父老沾襟嗟薄福此理冥冥定誰坐異時得君逾所聞香健
鷓盤霜旻信矣此地不可久空使遺愛傳邦人邦人姑止聽我
語逍遙閣去天尺五長身仙翁昔游戲日日烟雲泛罇俎仙翁
又已朝紫皇功行不泯鍾諸郎扶疎密蔭被所至遂令此閣如
甘棠我昔西畿數來往日脚闌干犹可想塵埃滿袂阻登臨白
髮心期負真賞六月炎汗如洗江南雨多相隄水旗開鼓響
船欲發超然爽意目君起驂駟一跌愈莫止大鵬會展滄溟翅
何妨閣下敞高門更看陰功動閭里

送芝老

江頭春色已可掬風雨惱人常不足筆力俱來紙上春墻外落
紅爭藪、忽然別我下廬山蓮社風流指頤間為我寄聲陶五
柳少留佳處共追攀

題王循書院壁

謝韓君錫小會

熱不就惡木枝渴不飲盜泉水古人不可期歲月姑相委不愛
尔井泉百尺深不愛尔庭樹千里陰相看豈計一飯報長嘯聊
為猛虎吟

近得石菖蒲胡伯鎮見之謂必以錦石資藉乃可以久
遷輟所有為貺仍枉佳句次韻奉謝

倒屣得小吳不言四時備遺我百明珠書窓遽增氣石盆叢秀
轉光輝携挈哀慵絕塵世更煩蒸思立維持紙上盆中盡玲瓏
他時相對擘鱗脯何必方平為紹介

丁德孺置酒適與陳君俞聯坐聊賦小詩為君俞謝因
以贖先起之罪

春風不解事吼地如雷霆誰知一席間笑語燈熒熒主人意弥
啟設置不少停而我槁木然感慨時自驚多情接勝友孤朗如
初星微吟間相警似欲慰獨醒我老百不堪已分如漂萍解后
因事樂尚或有此形不慙引去先得意耳暫清晨展轉尋斷夢間
関媿微生何當万里浪相與同滄溟

贈劉九思山人

我行亦偶然君來定何謂風高浪如山聞者亦已畏而君從一
葉過我乃特地郵亭六日俱臨別尤自媿朝出纔辨色夜歸或
露醉殘燈不見人待我獨忽睡語款多破顏情極幾屑涕屈指
再相從便作新井計我擔既弛肩名駕亦方稅不覺涉四年俛
仰纔一喟每見意每加終始不少替願匪求名頑豈不懷此義
凡生等飄蓬何物非委蛇為我謝故人隨方聊自慰

題繁川徐氏孝嚴亭

奕々欲報恩歲月猶過隙常恐寸草暉終負陽和力萬鍾非所
養所重在以色庶幾參輿騫不獨慕今昔千尋用或短乃未及

咫尺哀哉過隙心
泪盡墳草碧
坐見食亦覩
幽明固無隔
烝嘗雖其時
要是未為得
詩書聖人事
力久真自積
卷舒豈他人
悲孝均我職
尚容表龜跌
過者必此式
長江會生塵
德澤何可極

次韻秦處度同登黃山

艱生縲紲餘
特尔脫魑魅
殊方窟飄蓬
未免遊戲事
眼力到毛髮
扶剔盡竒秘
解后平生歡
咲語當歌吹
曲環豈人謀
明滅殆天吏
慰我雲烟期
有覩鴻鵠志
百年一瞬尔
幸此半日地
聊攄廣莫心
無作雍門淚

處度再和前詩見寄復次韻報之頃有所約今不逮悲
愴無已題于褒禪方丈

愛山平生心
殆若鬼所魅
茲遊媿不早
危至失吾事
佳辰秋正晴
有物不自秘
晶熒麗初陽
浮動荐微吹
幅巾方袍接
固可稱傲吏
躋攀敢惜力
卜築豈無志
稽首定明光
願借一席地
何在眼中人
不覺衣上淚

次韻陳君俞携酒見過

野人欣莫逆
君子戒多上
幸尔違朝市
聊復圖蕙帳
薄田几負鄣
山水分背向
巾車俯秋成
舒嘯會隨仗
吾友真可人
輕舟數相訪
投懷失枯槁
達意信搖蕩
時哉固難得
觸境沉波浪
謂我來歲寒
種、不少創
杯盤挽氣類
論辨極戶量
敢辭屢舉白
自喜老弥壯
回頭易陳迹
傾倒乃惆悵
樂事須勉旃
何遠非醞釀

迎暉閣

霜風吹我衣日短歸路長放懷即可家何遠非吾鄉稍聞東南隅勝致寓一方超然世外人鷄黍隨低昂蒼薨闕無際戶牖延初光訖云日月久但知歲時康每逢會心處萬境不得藏何當駕脩翰飛雲共回翔淋漓非所期遠目聊徜徉庶几蠓眼白打出鷺兒黃

張君好藏茶多能識土人歲入貢必迂路以致其新故名聞江上

和遊一人泉

新詩解人頤秀若披雲鬢突然不可揖平地翻波瀾褰衣媿招携每見輒汗顏况茲天際遊物理知難攀一來金陵居終歲不得間勝踐固疇昔欲往獨見刪命駕等人尔底事獨我慳豈非勒移灵不許汚名山因詩想其愛四來直仍彎裂臍那復惜頓足已滯頑清甘似可飽忽遽誰其還何當强扶老寄迹雲霞間要須君意果莫遣我盟寒曉來雨脚断去夢已班

秀遠堂次趙德孺韻

韓君錫起秀遠堂結中隱菴趙太傅德孺賦詩秀遠堂詩云翰林李謫仙埋骨青山下平生愛此山老去終不捨放逐鷄鷺行進隨鴉黍社文采今尚存英風滿松楸寥々五百年好尚世所寡韓子荊州後為裘襲良冶乃祖當時輩吳代同瀟灑結堂山之陽真趣非少假秀色來天外遠勢色平野烟嵐浮翠黛攬之不容把徜徉盤谷遊屢謂秣吾馬時無謫仙人登臨時賦者

九原如可作一奠招魂學

愛山依山住如山不少下山中所有多惟取不容捨烟雲寔交
遊松竹乃保社尚欠目所窮披剪寧問櫛廓然宇宙寬信矣和
無寡隱：徹四垂萬象入坯冶初疑彩間錯又若墨勻洒造化
非遠然一一類見假吾友端可人韻勝不少野更將桃李俱參
差移拱把時哉須自勉歲月甚奔馬得難未易失詎有長年者
何妨倒載歸日日無虛學

中隱菴次趙德孺韻

德孺中隱菴詩云

在昔避世賢隱居豈自喜甘守西山餓清洗潁陽耳一旦事高

尚萬古激貪鄙孰謂樂山林便可輕朝市竊咲效顰人不知捧
心羨妾將凡庸姿敢晞明哲軌盜此嘉遯名紛若干時子仕塗
指捷徑矯偽汙青史聖朝陽仄陋采錄無遐迩不遺下体封况
乃中鄉芑多士生此時貧且賤烏恥夢自傳巖來獵從渭濱起
隱君聞此風翻然烏可已聊為知者道庶達名菴旨

退之以文鳴詩友得侯喜声名力與俱雖尊未勇耳潢池詎青
山孰辨都與鄙菴成誰振之句出闌如市千仞寧我高充實信
我美坐令菴內人前車云可軌禮樂有先後：進則君子執方
而昧圓俱野那復史伐柯固執柯疇克求諸通蒸之既匪薪采
焉又非芑近交韓而侯步驟亦常恥一醫消息盡布毛自何起

要須六月息不息不為已敢問二詩人如何得意旨

庄居值雨偶得十詩示秦處度

累日雨不止風高如作寒三分雖過二忽忽便向闌一身百憂
集况可計先惟不見是無悶念此聊自寬

滿眼都是水歲事從可知早時謂有餘今空未免饑一雨又三
日見者皆攢眉天作人承之到此終何為

我雖非故侯通籍三十年孰不夷陰半而我終歲難念非跣弗
視不覺乘波瀾餘生豈所期我君信如天

平生三四友一一人中英况逢不世主唾手可太平參差十年
間契濶而死生相見復何語但有淚如傾

死生固可嗟一謫輒不返君恩非不深奈尔道路遠反初不忍
歌折臂信能遣已矣何足論幸子真入眼

念我宜州兄見時論弟昆詩書固分路翰墨俄同門人誰不歸
來獨沾死後恩万里一銘旌犹能塋家原

夕郎天下士異同親見之欲掩不可得交口終何為不百汰剛
愈精魑魅今尚疑浮雲空去來皎々端所期

不返故鄉義何妨陸子居昔游既有約是豈人所圖我嘗邀此
卜蹭蹬不自如憑將一掬泪聊寄夜臺書

向晚風斗轉場上稻已芽問雨何薄相偏來戲吾家蟋蟀床下
吟
戒寒謂稍疎行矣逢此嗟

寶光齋
競爽聯夜光一箇乃明月吾友不可見賴爾相怡悅蒹葭空非
倚聲聞乃不輟啜菽安暮年足以絕

姑溪居士文集卷第二終

姑溪居士文集卷第三目錄

古詩 歌行 附

題楊子儀虎圖

送人一首

書長干僧房

和人雪意

和人感懷

次韻東坡所和滕希靖雪浪石詩

甘露堂歌

白鈴轄席上琵琶

雷塘行

姑溪居士文集卷第三目錄

姑溪居士文集卷第三

趙郡李之儀端叔

古詩三歌行附

題楊子儀虎圖

秋陰報初寒，慘々日遽晚。有客自宣城，明爽叩昏懶。手持兩巨軸，六幅從而展。披圖画如生，竟軸詩盡選。平生說色鼎，今日真到眼。何止辨駟驪，于焉識淄渑。愛之不能已，欲挂恨壁短。猶冀逢他時，更疑探深遠。

送人

冥々天邊鴻，蕩々風中雲。一咲偶相逢，擊節聊送君。我室豈無

酒胡為不開罇所貴樂文字固非異猶薰天門直牛渚南北如
相文想君月下吟未厭俚 聞霜空夜自明江日寒微昏會當
借餘鯨永謝五濁渾

書長干僧房

昨日方得書經年不相見書來必累幅分明如見面雖同兩千
花略不通一線誰云非吉祥便是金毛現

和人雪意

雪意與春約野情因物裁輒將無窮思聊濟有限才雲容忽破
碎山色如招回携持固夙昔端為此儕來歲晚君羈旅微君誰
我陪祇恐造化工特地吹葭灰一剖不復收寂尔為之胚哉

競秀發翩々絕嫌猜恍然徒倚間浩蕩心胸開境界適何許次
第分隅隈高足超日觀塗如下離堆四顧始無聞忽覺驚初雷
有形均難悉無物非蒿萊却應求 仙失路迷天台波臣復咲
屈市門徒德梅庶幾未始得掇拾同舉杯攘袂即千古一醉姑
相媒

和人感懷

高山在平地高山地為 明珠出深淵明珠淵豈期高明在人
要須其時物理固如此了不差毫厘 端自窘歲月相

奔馳所以得龜勉吾人惟能詩我非知詩者平昔竊好之每出
每可愧未易皆墳麓而君不我鄙論極牙解頤六年如一日不

取笑則疑彼烏足為計有類寧同嗤一朝膺召命閭里增光輝
不曰人可賢但從外物移我賢君亦賢誰能窮是非我欲挽君
苗：君竟何為聊作感慨別肯効兒女悲陳人不自信流品須
維持誰謂廊廟姿如我品乃宜江充與丙吉厚薄惟異施其後
七葉貂陰功終表儀是等代不乏浪尔分駟驪時哉君何失儀
鳳方臨池為我寄聲謝擊壤正自嬉勉旃夔龍事賡載冀勿隳
立賢本無方莫為陳言欺

次韻東坡所和滕希靖雪浪石詩古律各一律詩見後卷

風波末路方奔屯屹然不動誰如尊豈知胸中皦十日顧眄不
接無重昏東現海市俯弱水南登赤壁凌江村斯文未喪天豈
遠出沒狐鼠徒千門綸巾羽扇晚自得已聞漠北幾亡魂由來
妙趣入造化地靈特出雲濤根生平到處苦再歷隱：似有屐
齒痕玻璃鏡裡萬象發金粟堂中千偈論會須白玉漱寒水更
借落月傾金盃咄嗟羨溪成底物混沌空夸竅鑿存

甘露堂歌

炎天熇：如湧湯使君置酒甘露堂無風但覺冷徹骨坐來彷彿
飛青霜使君顧客指新榜天假此應來輝光八十里叟感盛
事獻頌請名相激昂我非取專已上報堯仁舜智方當陽途來
瑞應發處：中臺第一彤雲章吾邦雖僻亦影響明德所祐真
無疆已而轉眄欲受簡慙非叟比疇能當輒因勝遇強侷倪庶

幾擊壤同揄揚吾君之澤不可象使君之惠何可忘才高名重
偶暫屈遺愛他日逾甘棠嗟予落莫徒自感乍鳴乍已如寒蟬
安時逐境姑委他隨緣致力聊為鄉時逢載酒問難字未擬持
筭搯群羊但知今日不易得縱不能飲酒空觴

白鈐轄席上琵琶

青海傳烽沙遠塞謀將橐戈身不介却携紅袖弄煙月醉咲溪
山窮物外文章殺名家世事投筆收功無十載天子幾嗟相見
晚暫許南朱脚曠快一時賓客多可人坐令五月如深春西棟
潭：簾半捲濛：香霧無纖塵雲披霞散爛紅綠滉漾無處投
精神秦樓風輕雁初泊玉指如流乍前却捍撥當胸拍屢催一

段風光未獲索雖無儀鳳與舞獸擊拊分明諧振躍緱嶺排空
午夜涼香：鶯吟上寥廓逡巡舞袖迴飛雪紅茸毯襯鴉頭鞮
落花飛絮互續紛流星掣電爭明滅主人情不已下客歡正濃
更邀姪姪持金鍾從來酒戶落人後漱灑不覺隨手空金張燕
接平生慣矧眼今朝真未見敢辭醉倒菊花偏只恐銀潢低曉
箭鈞天一夢固依稀欲問桃源路已迷何時再到紅茸地更遣
游絲惹住伊

雷塘行

鞭長不能及馬腹有限生涯時苦促空使後人悲後人雷塘春
草年：綠誰知秀色若可餐風光付與初凭肩力殫四海咲未

已眉黛一螺當幾錢君不見黃金棟樑回首蠹漠漠胡沙青冢
暮么絃欲斷空自知千金漫買長門賦膏油續盡天須曉石土
餘壘可長保就令並蒂永不分也應終恨雷塘草

姑溪居士文集卷第三終

姑溪居士文集卷第四目錄

律詩

讀吳思道藏海詩集倣其體

次韻東坡和滕希靖雪浪石詩

次韻東坡還自嶺南

寄邵暘叔發運

次韻東坡沉香石詩

送曾端伯之官濟北

濟上閒居

告別子通

和儲子椿竹

和子椿七夕

題蘭皋

戲子微兼次韻陳君俞寄題蘭皋

題訾老小軒

因過故山齋僧值雪遂賦小詩

送宣上人遊方

次韻郭功甫從何遊白雲寺

題白紵山

石端若似朱絲欄見邀作而偶失所在久方得之喜而

賦詩寄丁希韓因以見及遂申前志次韻

再領玉局

次韻葛大川喜王君相過

呂吉甫第乃謝鎮西故居中間常為佛刹而双檜則舊物也劉夢得有詩因賦其韻

題張湛然兄弟所居壁

李去言相別二年忽得書

與珪元白相別之次日大雪

次儲子椿金陵作別韻

又次子椿同君俞三詩

次韻子椿金陵相會詩

次韻子椿遊兩花臺

又次莊居見貽佳什

姑溪居士文集目錄

姑溪居士文集卷第四

趙郡李之儀端叔

律詩一

讀吳思道藏海詩集倣其體

唐末詩人自一家剪裁風月間鶯花滄陵陸緒篇：勝點綴餘
妍字：斜遠水連天未怨笛爛霞烘日帶棲鴉法書警句真如
此流落槍榆重嘆嗟

次韻東坡和滕希靖雪浪石詩

古詩見前卷

平生所願識荊州別乘還容接勝流吳日崩騰驚海面新詩清
絕似槎頭常嗟盛事千年隔誰謂餘光一旦收便覺時源得三

味目中無復有全牛

次韵東坡還自嶺南

憑陵歲月固難堪，食蘖多來味却甘。
時雨纔聞徧中外，卧龍相繼起東南。
天邊鶴駕瞻仙袂，雲裡詩牋帶海嵐。
重見門生應不識，雪髯霜鬢兩毵毵。

寄邵陽叔發運

德門平昔仰高陽，自是芝蘭根本香。
未許藩籬承妙晤，聊因文字借餘光。
艤舟月下逢桓守，盤馬樓前見庾郎。
冬杪相期定如約，為君雲影認鸞皇。

次韵東坡沉香石詩

海南枯朽插天長，歲久峯巒帶薜蒼。
變化那知斲山骨，儀刑兀只在人腸。
幾因曠日疑鑄蠟，試沃清泉覺弄香。
折莫輕珉亾十襲，須防偷眼誤摧剛。

送曾端伯之官濟北

貂蟬七葉想前人，四世三公表一門。
虎步龍驤推贊冊，瑤環瑜珥見旁孫。
琅玕廟器真無敵，衮纓淮流信有源。
敝帚不堪終舊物，吐茵行欲奉餘尊。

濟上閒居

閉閣焚香萬慮澄，莫云身似打色僧。
功名了未榮三事，理性客先契一燈。
丹灶鶴歸休炷火，茶甌客訪旋敲冰。
倦來却有登臨

興上徹層樓最上層

告別子通

之儀早從粹翁子權遊于門下寔為舊物也而子通之賢蓋
願見者非一朝夕于是踰月既蒙分榻延挹又獲旦暮親炙
告別遽有期懷恋不能已小詩以致感遇

謝逵蘭玉舊聞名早歲風流接二兄白璧無瑕尊士望青雲有
路藹鄉評簞瓢弗改真天樂簪紱相高半學生授館不為經宿
去心知黃憲異袁闕

和儲子椿竹

何物能令意灑然陰森常對出蒼竿排槍立戟誰為况招月吟

風好細看几度驚回窓下夢新來添得雨中寒傷心不見東坡
老縱有鷺溪下筆難

楚：相親豈偶然依：隨處自成竿固應表見風塵外莫作尋
常艸木看好事借名真有謂多言雖巧不能寒相思乍可食無
肉一日無君恰似難

和子椿七夕

何用封侯曲似鈎且將膚寸等岑樓佳時未用傾河鼓爽氣先
期勝蓐收月彩正迷千古恨雨聲還助五更愁王孫賞詠元無
敵又見詩中第一流

題蘭皋

萬綠交陰別有天
艤舟重到尚依然
回頭白髮三千丈
倒指青編二十年
賞詠未論臺閣舊
維持今見子孫賢
何當
披陳迹
再
把
重
衾
託
醉
眠

戲子微兼次韻陳君俞寄題蘭皋

和風暖日作霜天
冰雪相投豈偶然
特枉新詩詠塵迹
便同佳趣賞當年
學優曼倩三冬足
才過荊州十部賢
為問醉衾應好在
莫教癡望似蚕眠

題詈老小軒

高步毗廬頂
上身旋開窓
牖外風塵石
菖蒲是從來
友龍焙茶為近日
親不見同行
木上座常留
伴睡竹夫人
艱難歷盡無餘

事問佛方知有此因

因過坎山齋僧值雪遂賦小詩

霜露悲傷老益增
輒憑精意託真乘
舞花忽報難遭瑞
佳氣冥符不盡灯
簷葡萄園中紛一色
兜羅世界結千層
五天應供非虛語
從此雲頭日：升

送宣上人遊方

七軸蓮經誦已通
定將何事作家風
當知法界重：意盡在雲遊步
中金臂見時
猶是妄玉毫光處
未為功路頭
全記文殊指
須着工夫子細窮

次韵邵功甫從何手遊白雲寺

已仕因循已過三買田歸去不須叅高明漸擬凌清漢皎潔方
知在碧潭試酌甘泉來覺晚已躋絕頂尚猶貪便應從此都無
事祇有君恩未報慙

題白紵山

回見黃梅雨後天炯林常在咲談邊早時欲到不自果今日初
來端有緣無復斷聲傳玉齒空餘殘照滿金田不知誰是雲霞
侶聊揖高風一悵然

石端若似朱絲欄見邀作而偶失所在久方得之喜而
賦詩寄丁希韓因以見及遂申前志次韻

斷雁沉蹤共倚欄定應齊客解偷閑忽驚遼鶴排空至何啻庶
珠昨夜還假寵已慚名下誤強顏終愧筆頭慳江流有盡情無
盡須把高風付子山

再領玉局昔東坡翰林作詩送戴蒙有玉局他年第幾
人之句後自嶺外歸遂領玉局予後官亦得之坡今已
矣悵然有懷

東坡因地夙相親玉局終為繼戴人祿仕豈知承未軌恩光又
許襲前因青蠅附驥元非援白玉無瑕晚更真泉下有靈應首
肯不隨凡劣易淄磷

次韻葛大川喜王君相過并寄吳思道

君恩曾未報織埃倦緒淹時鬱不開高義不忘轅下舊好音常

自日邊來欣逢雅好非空至頓感陽春泛酒迴早晚退朝紅葉
下細談陳迹共餘盃

呂吉甫第乃謝鎮西故居中間常為佛刹而双檜則舊
物也劉夢得有詩曰賦其韻

故國悲涼古木奇勢分連下蔚相差霜根半露出林虎畫影全
舒破賊旗寶界曾迴鋪地色節旄還映揀雲枝劉郎風韻知誰
敵儒帥端能表吳時

題張湛然兄弟所居壁時謁之不見

樂全老子如星日真一仙人似鳳鸞早歲光明均照耀吳時文
彩避高寒低回氣類追千劫解后風流得二難環堵蕭然清徹

肯却疑深雪卧袁安

湛然乃安
道之孫

李去言相別二年忽得書知在吳中答書偶成

官路相逢一笑休共知身世兩虛舟楚才有用誰青眼趙將無
功枉白頭會見姓名通北闕何妨風韻冠南州求田接武如鳧
鷖只欠元龍百尺樓

與珪元白相別之次日大雪火邊有懷其人

上人偶作十日留才別便覺如三秋應覺擁爐華嚴客不知對
雪姑溪愁清詩字、吟可老冷日惜、誰見投媿我霜髯不容
剪寒灰撫盡欲何求

次儲子椿金陵作別韻

千里波濤一葉中急難平日但聞風自非積習有天得那復間
闕特地同樂事放懷須命酒生涯何處不飄蓬先歸只作尋常
別折莫樽前感斷鴻

又次子椿同君俞三詩

倦途回首已無牛獨向田間涉半秋倚仗固知同失馬攀援猶
恐昧捺舟漸逢陌上相推醉尚有空中未下鷗可是道邊無壘
地官將身世曲如鉤
西來不復見青牛問遍生涯兩鬢秋但受郢人夸鼻斲豈知蒙
叟是腰舟柱頭寂寞千年鶴波面分明一点鷗不向虛中問消
息磻溪終老但垂釣

隱：山林似卧牛紛：鑷擔喜逢秋虛名謾託三春柳寔際須
歸万斛舟未信此生真整馬且將餘日寄江鷗崎嶇精衛人空
笑終恐長鯨上直鉤

次韵子椿金陵相會詩

濛：小雨落征帆漠：烟雲遠近山屬意幾回真入夢欲來常
恨澁如灣家程豈復嗟留滯物外何妨且往還便恐都人入圖
畫却應難寫是高閑

次韵子椿遊雨花臺同長老德正

勝遊自有經年約佳客難同信步來無復風煙醫寒日漸催花
柳映高臺雲光故事空陳迹玉樹遺音失舊哀今昔循還等相

視欲尋歸路更遲回

又次莊居見貽佳什

茫々巨浸托船歸風不充帆氣易衰
猶喜歲寒逢逆旅不將人事異
當時從他老去知何用由是終焉
豈自遺獨有東阡南陌意莫辭
扶杖數相期

姑溪居士文集卷第四終

姑溪居士文集卷第五目錄

律詩

用聖行韻和呈幾仲

和人見寄二首

澄虛堂

和子椿

莊居寄友人

和友人見寄三首

舊懷二首

送人入館閣

解后故人

金陵懷古

和人見寄

邯鄲叢臺

久雨次韵君俞

次韵君俞瑞香

次韵君俞四首

堤上閑步

題韋深道寄傲軒

次韵君俞兼簡少孫六首

觀東坡集

姑溪居士文集卷第五目錄

姑溪居士文集卷第五

趙郡李之儀端叔

律詩

用聖行韻和呈幾仲

牢落郊原正早收
書來起我頓風流
絃歌韻裡識琴賤
鴻鵠飛時逢爽秋
極目烟雲來指顧
何時談笑共沉浮
文章落筆驚人眼
新有聲名舊姓侯

和人見寄二首

雍容閑雅許君都
萬緒相逢一笑無
休把盛衰觀世諦
且將言語共詩圖
人上人得同吹呖
潮落潮生等據梧
只恐後庭歌不

盡曲終翻被鬼揶揄

傾蓋相逢惜別離等閑談笑盡心期他年終解如今日此念常
應寄吳時餘事不妨多蠟屐放懷贏得盛苗詩早携桃葉尋歸
路準擬花間倒接籬

澄虛堂

公子高明悟劫灰鼎開軒語致幽懷縈雲疊嶽鏡天去極目滄
波入坐來千首詩成談笑裡百分酒盡筦絃催自憐曾是高唐
客欲賦慚無宋玉才

和子椿

一番霖雨下商巖末路方收破冢帆鷄肋未能忘馴畝驪珠還

見發囊函潤分餘浸回枯轍色借陽春起陋緘自是亨嘉相際

會便應從此出塵凡

陋緘一作病杉

莊居寄友人

槐黃時節早相期留滯田園阻整依聞道程文大超軼却因詩
句接光輝君能活計如公理我愧生涯負表微已向青山託遺
老不應專有謝元暉

和友人見寄三首

明月平時敢自因時高蘭玉信吾人便從緱嶺如無媿更許毗
耶約問津每見似醺千日酒不言常備四時春妙雲豈獨南遊
契又喜鍾山近得鄰

俗駕難回固有因，勒移終愧北山人。
不辭冒雨投歸步，始信忘形是要津。
一笑未容披軟語，十分先覺報新春。
定應偏契王郎便，消得從來願卜鄰。

除却吟詩總是塵，道人應笑可憐人。
固知叅請能成佛，未到升騰且咽津。
村落風烟常似臘，禪房燈火已如春。
會須隨例餐餽子，聊借明窓作慙鄰。

舊懷二首

陳迹回頭似夢餘，花應長好但人無。
詩成固已名千古，墓上誰傾飯一盂。
流落丹青驚始見，形容笔墨竟難圖。
公孫自是天同派，謾託周人載碩膚。

花存人往祇天知，日暗心搖却自疑。
尚想漢廷傳詔令，如登魯廟見樽彝。
一時鸚鵡娛賓賦，百世甘棠美召詩。
安得殘春逢海上，盡傾哀泪灑新枝。

送人入館閣

天祿崢嶸北斗齊，享窮人欲去無梯。
自非終賈名偏重，祇恐蓬瀛到却迷。
鉉槩吳時森祀梓，功名他日有虹蜺。
中朝若問姑溪老，但道摧頽一木鷄。

解后故人

湖山勝處得君家，懷祖曾于膝上誇。
不見多年應宦遠，相逢何事却天涯。
朱絃無復來湘水，駿骨分明產渥洼。
聞道賢勞多野

處新醅聊寄敵霜花

已將身世等浮雲又向江邊得故人
數日暝寒埋雪意一番佳境為時
新村醅淡薄聊資笑洞戶深閑自
有春已幸鄰封同寄老却應風月
費精神

金陵懷古二首

焰燧何勞鼓萬牛聊將一帶付幽流
纔聞浮鷁來波上已見牽羊出石
頭舊穴依然披信汐古祠誰為荐
時羞功名到了成何事擾々空移
是壑舟

霜天日曉獨沉吟潮上風來別是音
恃險戰爭休想舊凭高臨眺且論
今數殺雁感千年恨一片帆驚萬
里心不是江山解磨折却應人物
自升沉

和人見寄

壯志崢嶸不自伸低回聊此接波
臣雖非腰重真騎鶴猶勝途窮強
泣麟擊節久懷洲上晚空樽未放
網邊春固知遺老能相契翻愧公
翰作幸民

邯鄲叢臺

禾黍離々露一丘淡烟輕靄夕陽
秋微基西枕邯山盡往事東隨漳
水流御輦金車何處去閑花野草
幾時休可伶全趙繁華地留作行
人萬古愁

久雨次韻君俞

塵埃肺腑屢更時
淫雨平欺素領垂
忽覺光輝慰岑寂
坐令華茂轉離披
中宵未厭徒空壁
雅意安能系赤墀
有晴明陪擊節
回腸猶在不為詩

次韵君俞瑞香

占盡韶華吳衆芳
分明絕艷降昭陽
官同繁杏換春色
謾道幽蘭有國香
大葉尚疑攢處髻
馬嵬猶認去時囊
牡丹獨賞慈恩句
只解金盃比發粧

次韵君俞四首

文章老去豈能神
猶有殘膏占舊名
賦就賈生空自感
詩成侯喜近聞聲
拾塵已信非嘗飯
撒豆終知不是兵
多謝嘉篇慰岑

寂便思約伴問歸程

合浦圓光降下胎
豫章千尺本天材
未能海運參搏翼
聊復舟行共覆杯
白髮情懷雖草莽
青春消息自條枚
何妨接武窮幽致
莫待風光却見催

語解驚人固有神
始知無不是虛名
方觀去接天邊翼
何事猶諧黷下聲
齊晉近能通軟血
江黃詎敢議鏖兵
老來肺腑都荆棘
頓欲薶鋤不計程

熊掌如何得豹胎
棄常嗜吳信難材
端能不學邯鄲步
正可同嘗沆瀣杯
有意良圖休我老
他年吉卜佇君枚
雲間日下容相契
且置然其特地摧

堤上閑步二首

風旌江木信漂浮散策騰、亦謬悠未必縈回能擢勝却疑平
遠解供愁年哀易感難留日機盡應無不下鷗渡口舟橫晚潮
急一番佳意憶蘇州

暖風輕撼浪花浮留滯江城媿謝悠吟苦空多屈原恨賦殘猶
剩庾郎愁漸日卜築投歸鷺聊托潺湲習戲鷗可笑麗官殺風
景滿船絲管載涼舟

題韋深道寄傲軒

南窓何似北窓涼寄傲來風各有方千古光輝如昨日一時收
拾付新堂已驚酸裡醅初綠更覺籬邊菊漸黃就使主人官即

顯此間高興定難忘

次韵君俞兼簡少孫六首

連壁兼金盡出倫雪髯霜鬢信陳人能忘杓鑿方圓吳許接風
雲變化新絕韻淹時勞極目虛齋窮日但凝塵何當一笑披環
堵賴月吟哦未厭貧

殘編樊藁掩還開好意經年不暫來伏櫪已應真款段脫鞵終
擬謝低回頗傳共坐侵斜月更想微吟荐罰杯居士從來少風
味獨將愁眼望初梅

莫羨財多石季倫任從閭里笑長人五湖浪迹名終在六印懸
腰眼暫新且樂歌呼隨漉竿不妨文字洗留塵年來頓覺珠璣

富萬戶侯家却是貧

惜：懷抱不曾開忽：還添一歲來燈火香花隨贊祝兒孫播
勝共裴回休誇路寢當前拜誰得屠蘇最後杯何物相期全一
醉為君催發檻前梅

定應春到今日幾但覺耳邊多醉人已分餘生不如舊却應佳
句漸能新悲來徒有縈心泪：盡空驚满眼塵到得雖無真我
輩一簞猶是作家貧

書空懶作咄：語催老祇恠駁：來斷夢已將愁共遠離魂不
覺淚驚回病餘想見蘄巖玉歎處猶懷宛轉杯能伴晴和着履
否深山應有未凋梅

觀東坡集

今朝又讀東坡集記得原州鞠獄時千首高吟賡欲遍幾多強
韻押無遺固知才氣元非敵獨有心期老不欺淚盡九原無路
見冰霜他日看青枝

姑溪居士文集卷第五終

姑溪居士文集卷第六目錄

律詩

再次韻人字韻奉送禹欽且堅再來之約

襲前韻再簡少孫四首

次韻雪

題張約之長春閣

後圃

寄題子椿野軒

逃暑無地偶過君俞聊資華屋廣蔭以楫主人之勝綢

繆礼意遂至抵暮君俞有詩因次韻

歸自錢塘伏蒙君俞特枉佳句欽嘆不已聊賦來韻
贈金陵榮天和

劉君以地里之學各解后相遇求詩為別因賦長句
伯鎮客居傷春佳句輒賦元韻

次韻夾竹桃花

次韻聞笛

和郭功甫贈陳待制致仕

和人三首

次韻採蓮

復次韻

次韻子椿庄居述懷

次韻早秋

同子椿遊三品石得井尋三閣故基久之因以次韻

陪延之泛舟歷湖至苦竹寺次韻陳致君席上所賦

宿太乘贈初燈

姑溪居士文集卷第六目錄

姑溪居士文集卷第六

趙郡李之儀端叔

律詩

再次韻人字韻奉送禹欽且堅再來之約

淙、梅雨漲江濱耿、僧房借鉢人秀色驚回隨念到孤懷羸
得暫時新何妨一笑空諸有更覺三摩淨六塵憂患年來倍傷
感送君哀泪不容貧

相逢懷抱各全開鬱結才舒倏又來傾倒已辜將進酒追隨休
賦上林回臨分莫作楚愁嘆故事須詢河朔杯看取滌翁宜自
警空將遺恨感蘇梅

襲前韻再簡少孫四首

由來氣類即天倫孰謂劉琨獨可人稍隔相從更無味幾日拈
起又還新席間誰致龍皮異雪裡常懷鶴羽塵祇欲期君拾瑤
草庾郎三韭未為貧

雪意埋雲蔚不開新春還傍故春來未堪翫翫倚門立聊復差
池接羽回得喪但知求失馬盛衰羸取付傳杯風流二妙天憐
我種玉秧中更挿梅

子默清真本絕倫羊曇仍是箇中人林泉不作南風競旗幟還
日對壘新金鑛躍鑪元有艷冰壺瑩月舊無塵何妨再葺昆陽
戟尋邑師行固不貧

記得金樽特地開舉頭新歲又重來銀潢已分經年隔玉節猶
期舊臘回千汲浪迷雲表夢百分愁寄燭殘杯醉鄉誰謂無消
息已覺歌聲傍落梅

次韻雪

臘日頻年未嘗雪今春雪與臘俱來暖歸白傳金焦葉寒逼温
郎玉鏡臺几處歡聲動絲竹一番佳思近離堆新詩不似尋常
見萬里豐登氣已回

題張約之長春閣

江山信美亦人同寒暑隨時興易窮寓意果能超物境養花長
欲占春風何須戶外屨常滿自樂尊中酒不空可笑道人猶有

恨一番紅盡一番紅

後圃

鶉鳩呼婦天欲雨杏子退花鶯未雖連前已覺綠半毯酒面忽
有紅隻鳧芳物戀客不忍去主人好賢誰復如會應百歲享此
樂何妨畫作重屏圖

寄題子春野軒

江山秀氣表吾人輦下開軒得趣新不擬舊遊離几席常令每
况隔塵埃客來談笑無非楚紙上文章近過秦分我一枝頻見
約乘槎行欲問通津

逃暑無地偶過君俞聊資華屋廣蔭以楫主人之勝綢

繆礼意遂至抵暮君俞有詩因次韵二首

無功衛鶴偶乘軒虛暑從誰解倒懸頓覺御風凌絕境似逢調
瑟認華年回光已幸叅東壁裂地何須得酒泉自惜抑揚非瓦
礫倦遊終愧失陶甄

十輪揚憚舊軒、四壁相如似罄懸豈謂投懷忘晚節每容佳
處共流年笑談璀璨風生坐翰墨縱橫思湧泉土苴固難重就
器轉鈞尤幸識精甄

歸自錢塘伏蒙君俞特枉佳句欽嘆不已聊賦來韻

吳山陳迹已飛埃投老還驚病眼開似泛靈槎海邊去却因華
表鶴歸來情移客枕收殘夢恨着江梅戀故臺便覺新篇資六

翺飄：真是子虛才

贈金陵榮天和

生涯已定不干時收拾工夫且作詩瀨水方來吊東野同安初
喜識丘遲兼將佛事資三昧又見風騷出一枝投老相逢能几
許何堪得句每相期

劉君以地里之學各解后相遇求詩為求因賦長句

久聞秘術獨超羣宵向青囊學景純解使山川如在掌須知禍
福不由人論功合附天仙籍底事猶隨
滿眼峰巒應有
待何妨裁剪出精神

伯鎮客居傷春佳句輒賦元韵二首

休論莫：與休：老眼逢春且暫留未必餘寒更能久祇因殘
藥易為揉及時行樂何妨剩感物興懷謾自愁南北生涯等羈
旅定應無着是清流

紛：到底不如休空把閑心見便留昨日白消行處去今朝綠
遍定誰揉且從寂滅翻千偈安用深湛詠四愁我生言多欲無
語每慙佳思枉詩流

次韻夾竹桃花

料理愁懷落那邊桃花烘日竹含烟墻紅密約連昌曉夏木深
葺繡嶺天籃舉造門如會面漁舟失路想當年因君咏出黃筌
笔從此風光生彩牋

黃筌作夾竹桃花屏風東川西川節度使
廳皆有之筌今不在以真花片補其缺處

幾不能辨枝上地下相契
不差毫髮天下傳以為工

次韻聞笛

涓涓水咽衆山泉隱隱雷驚二月天
共喜春工能應候方知節物似烹鮮
倦途所欠無多子勝日相逢又一年
好是群花應競發不須留待柳三眠

和鄣功甫贈陳待制致仕二首

十年朝馬望前程晚作琳宮物外人
徹骨清風真有韻醉心常德本來淳
新栽松菊開三徑舊檢方書備六陳
不是詩翁形美頌丹青難寫自由身

南北紛紜不覺塵鴛鴦湖水解留人
乳浮香焙誰同試蠹泛家籟分外淳
禪寂久回師粲可婚娒便可繼朱陳
莫從舊路尋歸夢占取東籬採菊身

和人三首

昂昂楚鶴固難群皎皎冰壺不受塵
一笑每逢青眼舊多情空媿白頭新
西風未用高紉扇東道應容岫角巾
珍重長謠倚雲瑟瀟湘誰是賞音人

經年牢落別離群準擬歸來拂路塵
妙語獨從書上得歡悰猶欠坐中新
頗聞洛下傳佳句更喜嵩陽識塾巾
几欲軍門示巾幘老來犹更不如人

荆溪風物記當時吹絮河豚下箸遲
綠滿金田朝應供紅殘朱

檻夜論詩幅巾已託遺民後杓柄猶懷象骨疑早晚雲間見金
臂空慙翠竹謾抽枝

次韻採蓮

聞道栽成十畝蓮便思挑出杖頭錢定知苻菜參差處不是決
明顏色鮮紅日半移芳草岬清歌低泛木蘭船驚心未得同真
賞空媿諸豪白玉篇

復次韻

國西華巖占池蓮曾記開樽奉賜錢幾欲漂流勞滯念又驚紅
綠映澄鮮主人無間容聯步勝日何妨更買船滿挹香風振婦
袂更煩佳思出新篇

幕府風流舊泛蓮裔孫家世掩青錢別開眼界霞爭爛分得秋
光菊未鮮燈陣有心欺醉帽珠盤何日瀉婦船錦囊示我鏘金
句空媿巴吟綴後篇

次韻子椿庄居述懷

偶曰秋蘂記初春增損元無尔自貧病骨蕭條驚歲晚新詩來
徃媿情親未應謝傅終有涕誰為劉公是可人艾火呻吟對搖
落不堪遶艸又還新

次韻早秋

衝：時序一郵亭睡美從今氣不蒸便好心期金葉酒乍驚夢
在玉壺冰栽松種竹來三徑效策輸龜待十朋百尺樓高誰與

共倦途初喜接陳登

同子椿遊三品石得井尋三閣故基久之因以次韵

桑柘丘墟輦路長景陽依舊在山陽石標官品名常在井記胭
脂迹半荒吊古謾勞興感慨寄懷聊以共徜徉相看等是未推
枕何日同驚夢後梁

陪延之泛舟歷湖至苦竹寺次韻陳致君席上所賦

已涼時節未霜前十里平湖共酒船巖岫湧寒清徹水芙蓉翻
浪綠連天百年過眼真聊尔一笑投懷豈適然獨有黃花似迴
避定緣紅粉不能先

宿太乘贈初燈

倦游知止未知還平日生涯只在山金碧喜逢雲外境文章重
見管中斑篆烟縈曉留無寐寶鐸吟風咲不閑他日歸棲雖有
地勝遊終寄夢魂間

姑溪居士文集卷第六終

姑溪居士文集卷第七目錄

律詩

賞心亭

遊城南張氏園劇飲待月上戴花作樂而歸市猶未徹
觀者如堵次致君韻

偶書二首

贈人一首

和兩翁軒

次韻珪首座

和錦繡亭

吳思道相送同宿崇因

寄僧

寄題吳思道橫翠堂

簡劉君秉

夢過趙仲強家坐中人物笑語一一如平時因寄長句

水中登王德循月閣

德循詩循甚佳作拙句以勉之

之儀家當塗七年矣屢過禪岳山下望高山塔欲一遊

輒不果感嘆不已因賦二小詩

藏雲山居

山居夏日

誠上人遊方既歸林下焚香誦經以嚴報地相見欣然

留不欲去遂賦小詩

宿青山坊君錫館置甚款時方興圩

將過黃池中路寒甚風猛不可行復歸青山坊投宿

次韻俞希賢大暑家居寄天寧二老

姑溪居士文集卷第七目錄

姑溪居士文集卷第七

趙郡李之儀端叔

律詩

賞心亭

賞心亭角倚欄杆
虎住龍蹲自居屈
蟠無復埋金銷勝氣
空餘飛鷺識前灘
百年名在人何處
萬里潮平雨送寒
幾向後庭更白紵
不堪殘焰下魚竿

延之云累日把酒止在相近處
殊不快人意坐間命福
索城內外可以延處之地
將往因之得城南張氏園
秋花班駁可喜
遂劇飲待月上戴花作樂而歸
市猶未徹

寶米齋

寶米齋

觀者如堵次致君韻

累日相看似處陰今朝乘興共追尋曲欄方沼爭苗步秀色新
啼總會心酒面屢從羅綺發花心休被雪霜侵燭城醉路凌初
月但覺人山一徑深

偶書二首

閉門只欲渾無事門外何嘗有事催生計不須憂水旱任途休
更問梯媒身安種：皆三樂客到時：共一杯此外華嚴是歸
處眼前樓閣竟誰開

小山相對數椽地樂與心期境自多有酒未妨同客醉無情到
了任君魔採薇行歌亦勞矣飲水曲肱還會麼只恐時來把不
住更看究竟事如何

贈人

落得清閑與物疎扃門終日似山居案頭新有歸田賦架上元
留緯世書紫府未須窮秘簡丹山重見引名雛詔恩咫尺來相
繼還許頻為賀客無

和兩翁軒

何處又傳金椀出凡人爭看玉山頽幽情不是風期舊異境難
從指頽開猿鶴已回塵外駕烟雲休造眼中哀未妨一老同巾
履香火終年謝劫灰

次韻珪首座

陰重爐紅欲雪天氣氲香篆不藏烟南遊步、如同歷西竺層
層有舊緣未覺鷓鴣聲驚戶外似傳梅信到窓前老來酒量無消
息負此佳時一慨然

和錦繡亭

漂泊生涯寄一萍勝遊長記錦花亭山來已訝天能巧春到方
知地更靈雖許登臨追曳尾却應顏色未忘形何妨共保千年
約白帽回頭笑管寧

吳思道相送同宿崇因二首

端門風月十年拋垂老山林寄一瓢可得故人來市脚共尋陳
迹到江郊麥黃且置塵中累眉白欣投世外交只恐話長清夜

短明朝去路不相饒

形單影隻久相拋鼎食端能勝飲瓢已分餘材辜北闕元非不
雨自西郊求田聊復同中隱玩世寧嫌瀆下交千古平泉有遺
恨謾勞精爽畏 饒

寄僧

得皮得髓謾多門實際圓融理自存諭意當時終一笑還鄉千
日見三孫維持佛法元無事建立家山盡有文占斷乾坤今鼎
足會多哮吼慰傳聞

寄題吳思道橫翠堂

紅塵擾、功名地不礙詩人得趣幽何必千巖連萬壑能令六

月似三秋茶甌變乳隨湯泛香篆縈雲盡日浮時覺東城添紙
價應知得句封勝侯

簡劉君秉

劉郎本是風塵外画舸新從越上來聞說露芽如瓜活更多溪
楮截方開雪消鼎面敲頻涌鷺轉池心首屢回洗滌睡魔臨二
景敢辭瓦礫換瓊瑰 黃庭有内外景

八月十一日九月六日二十四日三夢過趙仲強家坐
中人物笑語一一如平時因寄長句庶蒙蒸思見醉目
投一會面之慰也

憶陪金醖醉紅顏回首風光杳靄間老去未忘三汲浪近來頻
夢八重閨雲烟舊路到何日燈火虛堂真似山只恐斷魂收不
得更須佳思與招還

水中登王德循月閣

龍宮海藏固聞誇偶襲初涼泛客槎層檻迥高臨落日洞房無
數盡浮家閭閻可想知何在水相連杳莫涯借我華嚴記殘
帙欲將目地付袈裟

德循詩律甚佳方幸拭目目作拙句以勉之

唐人好詩乃風俗語出工夫各一家前輩相因多自任後來無
復更相誇半山老子偏遊戲真一仙人每嘆嗟傍出豫章登一
格憑君細與辨龍蛇

律詩

之儀家當塗七年矣屢過禪岳山下望高山塔欲一遊
輒不果吳時山主懃公大師與其子宣上人相過因往
報之取路回遠薄晚方到遂留宿棟宇一新舍次皆得
其便而宏麗高朗唯見者知焉又復規範齊肅鐘鼓應
接問之乃懃一力所就絲蓄粒聚未嘗毫髮資之人此
尤難者感嘆不已目賦二小詩

宰堵頻經眼伽藍未息肩多情兩父子同住一雲烟繚繞尋幽
徑從容慰昔年本無留客意投分且遷延
去住如流水興衰似轉肩新工幾奪目舊爨僅留烟願起三千

劫功收十八年見孫盡龍象家世自綿延

藏雲山居

鳥語晚更好山風秋轉涼心閑日自永簟冷夢尤長赤荐新春
稻清添舊蔭香此身歸有地去路尚何方
雨後山尤好秋來方此時心清覺老健步懶欲歸遲林響驚
鼯鼠風閑叫西肩善人吾豈敢去此尚何之

山居夏日

金鑠籠窓日黃繒蔽柳蟬戀鶯忘日轉借榻就涼偏好作宿山
計難堪被俗牽歸途迎晚炤豫促渡頭船

誠上人遊方既歸林下焚香誦經以嚴報地相見欣然

留不欲去遂賦小詩

委曲披高下
虛明得靜深
佛香平日願
經卷本來心
地據三車上
塵無一點侵
出山應有恨
何處似如今

宿青山坊君錫館置甚款時方興圩

命駕追彭澤
開懷得士龍
殘寒偏惱客
小雨未妨農
已幸同歸轍
何勞更賃春
川原如故里
疑是舊栽松

將過黃池中路寒甚風猛不可行復歸青山坊投宿

過午風雖惡
此心難自安
如何一時頃
遂變十分寒
忍聽僵夫訴
還思昨夜歡
祇應賢地主
猶作故侯看

次韻俞希賢大暑家居寄天寧二老

靜退陶彭澤
風流支遁林
論歡雖暫阻
投分本來深
客舍汗如洗
僧軒雲正陰
莫同俗眼礙
終負勝遊心

姑溪居士文集卷第七終

姑溪居士文集卷第八目錄

律詩

和答友人二首

食笋二首

謝陳無已相訪

昨日偶到北觀蒙君俞元載元發朗叔惠然見過

回酒一首

書長干僧房

無題三首

題歷陽天慶觀自然菴

自大乘將遊湯泉道中

雨中過明覺招上人輒留小詩

宿滴水巖懷趙德麟和壁間韻

夜行鞏洛道上

題李欽之承事宅

離宣城

秋日遊青山

遊青山因過西莊

同榮天和遊石城

謝人送魚

題齊雲亭

賀時相生辰

姑溪居士文集卷第八目錄

姑溪居士文集卷第八

趙郡李之儀端叔

律詩

和答友人二首

此日逢春社占龍得賁山雖能素願合未放老身閑家世綿延
遠功名指顧間自應天有助一到一開顏

春來自多雨行處只逢山賦分皆可樂貧生常不閑人婦挑菜
處鳥語落梅間翻恨新增酒何從解醉顏

食笋二首

燕雀初為友烽烟近卜隣不嫌千語聒只怕一籠新病眼常如

睡歸心喜似人耕餐猶見笋未省已無春

牆外是西閨每夜得應烽火

踈簾不碍日缺甃宛如塘默坐千古名佛忘形一炷香卷中貪味永鏡裡任頽蒼飲後終推枕逡巡又夕陽

謝陳無已相訪

下直來天祿柴荆故遠求論心日恨短歸路雨何憂紅葉繽紛晚黃花爛漫秋會須尋此况擊節再相酬

昨日偶到北觀蒙君俞元載元發朗叔惠然見過

勝日欣相得曠懷誰與同如何四君子肯頌一衰翁林杪收殘雨簷牙遞好風歸時不須問更待月如弓

回酒

莫笑和州酒和州酒却醇聊資千歲祝用贊一陽春柳信過將報梨晴点尚真醉尋平日路好在武陵人

書長干僧房

吳日延禪地今朝選佛場真身瘞堅固層級韻琅璫雨瀝家々潤燈傳處々光曾將一則語要路截諸方

無題三首

解后俱青眼招携媿白頭穿林犹畏日坐石忽驚秋不作崎嶇倦幾成汗漫遊臨分懷杜老月湧大江流

步武高低外生涯夢寐中不知三徑足信是一生窮觸目如逢舊隨緣似有功德應叅羽翼何異注魚虫

軒廡千尋碧江山一抹紅微吟接僚友健啖趁群童
暫論懽昔已通更憑將此况遠問雲溪翁

題歷陽天慶觀自然菴

一日復一日新年即旧年本來無欠少強自起攀緣
妙悟通三界清風寄七絃昇騰如未果且作地行仙

自大乘將遊湯泉道中

迢迢山路永漢漢曉風昏雨歇鳩呼婦年豐稻有孫
旅懷悲暮齒野飯寄前村只恐今宵夢憑誰續斷魂

雨中過明覺招上人輒留小詩

雨路如投洗山行似踏繩深閑逢竹院歡喜得詩僧
語款疑縲

蚤心明自有燈難忘惜別處高幾等丘陵

宿滴水巖懷趙德麟和壁間韻

瀑水瀉靈竇鏗鏘韶濩音樹深猿嘯月山迥鳥歸林
一曲廣陵散再歌梁甫吟天邊有鴻雁莫寄此時心

夜行鞏洛道上

夜久露華重寒鴉不宿棲月推銀海上斗過玉繩西
風脫林衣瘦山擎雲帽低流螢三四點趁隊過前溪

題李欽之承事宅

松竹龐公宅丘墳倚相家和声敦雁序秀色茂蘭芽
魯秉方如昔淮流詎可涯躊躇不欲去寒日任西斜

離宣城

倦客登舟際江城欲暮時恨長山自遠心速棹歸遲村市明魚
火巖城起鼓鞳詩成真有助新月上天涯

秋日遊青山訪太白墓二首

潦倒忘哀日風流襲墊中未能分朽骨還此挹餘塵弔古無千
載傷心為一顰依稀如到眼氣類信吾人

淹時苦炎暑此日遇初秋舊籍存千畝彛倫詠九疇但能尋曠
蕩何必事深幽未媿遼東笑真成知北遊

遊青山因過西莊

青山忽相值一笑脫征衫未就三都賦聊尋五柳潛並遊雖得

意作濶更愁兼問字終忘倦言歸但小慚旁求須作相未聘且
耕巖贈別無多語禔身要律貪

同榮天和遊石城

茲遊久寂寞勝士偶陪隨竹暗笋初熟江深鱸正肥但須頻結
社何必訪題詩會有重來日還應記此時

謝人送魚

珍重黃池秀風流迥出塵多情念羈旅脫網寄鮮鱗掀動龍蛟
宅驚回七箸春丹青如得便更擬問通津

題齊雲亭

凌空登白紵此地與雲齊一覽衆山小方知人世低暫留蝴蝶

夢終負杜鵑啼回向禪闕客何當別有梯

賀時相生辰

錫羨來經世儲休表降神雲間瞻鸞鷲天上識麒麟蘊藉三冬
學形容萬古春班庭傾玉筍鎮廟契金人帝載熙明格朝簽絕
擬倫淵參宥幄同德在斯民有作皆前用無言不緒陳光華
榮壽肇蕃錫會昌辰寵接張侯異年頒衛武均江干空引睇無
路襲餘塵

姑溪居士文集卷第八終

書